



Trais uffants en in vitg da muntogna, fotografada l'onn 1947.

MAD

# 75 onns Agid svizzer per la muntogna

Acziun da solidaritad tranter la bassa e la muntogna

■ (anr/gc) 1943, pia avant 75 onns durant che la Segunda Guerra mundiala furiava enturn l'entira Svizra, è l'Agid svizzer per la muntogna vegni fundà sco organisaziun communizai vla.

Ins era da l'opiniun che ual la populaziun purila saja la funtauna da vita da la naziun. Ils sforzs per rinforzar l'autarchia da nutriment han purtà in'ulteriura plivalitaziun da l'agricultura. Consequentmain n'èn betg ils retgavs dal latg, mabain quels da granezza e da tartuffels vegnids schlargiads. La surfatscha arada è s'extendida da 185 000 hectaras sin 300 000 tras l'uschenumnada «Anbauschlacht». Ils lungs servetschs militars activs ils onns 1939–1945 han engrevgià fitg la vita da la populaziun da munto-

gna. En consequenza da quai è la populaziun da las citads s'avischinada a la rurala. Quella prontezza da solidaritad amez la guerra ha effectuà la fundaziun da l'Agid svizzer per la muntogna 1943.

## Finamira da questa fundaziun

L'Agid svizzer per la muntogna s'engascha a pro dals carstgauns che vivan en las muntognas da noss pajais. Sustegnids vegnan projects che creeschan plazs da lavur en muntogna ed uschia era plivalur. Qua tras vulan ins impedir la depopulaziun e procurar che las regiuns muntagnardas restian er en l'avegnir vivas. L'Agid svizzer per la muntogna sa finanziescha exclusivamain da donaziuns. El na survegn pia naginas subvenziuns.

## Vast sustegn ed in premi

Sustegnids concretamain vegnan projects en favur da l'economia agrara ed alpestra, guaud, laina, turissem, energia, scolaziun, mastergn e sanadad. En situaziuns d'urgenza vegn prestà agid immediat. – Ensemen cun la Cuminanza da lavur per ils territoris da muntogna surdat l'Agid svizzer per la muntogna il «Prix Montagne» ad interpresas en territoris muntagnards che contribueschan exemplaricamain a la multifariadad economica ed occupaziun.

L'Agid svizzer per la muntogna sustegna dapi 75 onns ils carstgauns da là e procura qua tras ch'els han in avegnir.